



## Per regurdientscha a Vinzens Cavegn-Stock, Cuera/Sedrun

Vinzens Cavegn hai jeu empriu d'enconuscher per propi la stad 1942 sin l'Alp Tschumut. El haveva aunc gnanc dil tut 11 onns e nus dus essan stai ils pasturs da 100 mugias dil Thurgau si Tuma. Nus dus buobets tut persuls varga 15 dis si cheu e mintga sera engiu en tegia a tscheina e durmir e l'autra damaun ensi sco dus totos. Mo nus dus secapevan bein ed aschia eis ei iu. Oz sai jeu strusch pli capir che nus havein dumignau quei perisum, denton da lezzas uras (avon 60 onns) fagevan ins aunc buca tals quitaus. Nus fagevan nossa lavur sco sche quei secapess da sesez. Jeu sun staus cunents ch'jeu hai giu in gidonter aschi fidau e beinvlulent. Ed jeu havevel scret 1990 en la Tuatsch이나 nr. 15: Vinzens ed jeu havein giu la sort

d'ir sin Tuma cun rodund 100 tocs. Quella confidonna ha segiramein dau curascha, mo da l'autra vart era fatg vegnir serius. In mattatsch da quendisch ed in buobet dad endisch onns cun 100 armauls si Tuma...Nus fussen buca serabitschai sin Tuma cun la muntanera vessen nus buca giu igl agid dil paster grond e dil militar. Enzaco essan nus vegni d'in tgamin siaden entochen en vesta al lag. Lu essan nus stai ametsch. Ussa fuva ei mo da pertgirar ellas circa 15 dis en dus. E nus havein fatg quei cun premura. La damaun vegnevan nus baul siadora (varga in'ura viadi entochen sper il lai da Tuma) e la sera tard giu en tegia.

Suenter quella stad havein nus dus lu buca giu pli bia contact, entochen che nus essan suenter onns ed onns s'entupai a Cuera. Jeu luvravel tier il Cantun ed el era engaschaus tier la viafier. Jeu entupavel el mintgaton el contuorn dalla staziun da Cuera. Dapi lura essan nus puspei sevesi pli savens e s'entupai cun camerats da Tujetsch ed auters Sursilvans e quei per dar in scart troccas e setschintschar. Quei havein nus fatg regularmein ed aschia havein nus era mantenu il contact entochen quest atun. El ei staus per mei dapi l'Alp Tschumut in bien e nunemblideivel camerat ed amitg, ch'jeu vegnel a mantener en buna memoria. Possi il car Vinzens ruassar en la pasch dil Segner. A sia preziada dunna Christine ed a sia famiglia vi jeu exprimer mia profunda condolenza.

Toni Berther, Cuera